


U ovom broju, između ostalog, čitajte:

- Čoviću upućeni prijedlozi UPFBiH za izlazak iz ekonomske krize i poboljšanje poslovnog ambijenta
- UPFBiH traži od članica da se dosljedno pridržavaju mjera kriznih štabova s ciljem sprečavanja širenja pandemije COVID-19
- Medijska kampanja za usvajanje prijedloga UPFBiH
- UPFBiH osniva Edukacijski centar
- Potpisan ugovor o saradnji sa DL Trgovinom za projekat „Moj proizvod“ za 2020. godinu
- Prihvaćen prijedlog UPFBiH za produženje trajanja moratorija na kredite u FBiH
- UPFBiH počinje sa realizacijom projekta "Poslovanje bez korupcije"





Čoviću upućeni prijedlozi UPFBiH za izlazak iz ekonomske krize i poboljšanje poslovnog ambijenta

Udruženje poslodavaca Federacije Bosne i Hercegovine uputilo je zamjeniku predsjedavajućeg Doma naroda Parlamentarne skupštine Bosne i Hercegovine i predsjedniku HDZ-a BiH Draganu Čoviću prijedloge UPFBiH za izmjene i dopune zakona kojima će se omogućiti olakšanje i poboljšanje poslovnog ambijenta.

Ranije je Čović na sastancima sa predstavnicima Udruženja poslodavaca FBiH i drugim liderima političkih stranaka koje čine Vladu Federacije BiH podržao prijedloge Udruženja za što brži izlazak iz ekonomske krize uzrokovane pandemijom koronavirusa (Covid-19).

Radi se o setu fiskalnih zakona, odnosno primjedbe Udruženja poslodavaca FBiH u formi amandmana na prijedlog zakona o doprinosima gdje se traži da zbirna stopa doprinosa bude maksimalno 30 posto, zatim na zakon o porezu na dohodak gdje se traži da se propiše da se princip blagajne ne primjenjuje u slučaju isplate dividendi i povećanje ličnog odbitka sa 8.400,00 KM na 12.000,00 KM, te na Prijedlog zakona o izmjenama i dopunama Zakona o porezu na dobit, gdje se traži umanjeње poreske obaveze u skladu sa investiranjem koje izvrši porezni obaveznik. Udruženje također zahtjeva u svojim prijedlozima i povećanje minimalne plaće.

Udruženje poslodavaca Federacije Bosne i Hercegovine traži i usvajanje zakona izmjena i dopuna Zakona o zdravstvenom osiguranju FBiH, Zakona o fiskalnim sistemima FBiH, Zakona o cestovnom prijevozu FBiH, Zakona o profesionalnoj rehabilitaciji, osposobljavanju i zapošljavanju osoba sa invaliditetom FBiH, Zakona o privatizaciji FBiH i Zakona o poreznoj upravi FBiH koje je predložilo UPFBiH i koji se nalaze u

parlamentarnoj proceduri u Domu naroda. Radi se izmjeni jednog do tri člana ovih zakona koje bi značajno doprinijele rasterećenju privrede i poboljšanju poslovnog ambijenta.

Udruženje je i u formi amandmana pripremilo i tekst zakona o PDV-u kojim se, između ostalog, traži pomjeranje roka za plaćanje PDV-a sa desetog na posljednji dan u mjesecu, plaćanje poreza po naplati fakture za male



poreske obaveznike, povećanje praga za ulazak u PDV sistem na 100.000 KM.

U dopisu upućenom Čoviću, Udruženje također traži nastavak isplate poticaja do kraja godine i to ciljano onim privrednim subjektima koji su pretrpjeli najveće štete zbog krize i koji sami ne mogu izaći iz krize, te ponovno organizovanje sastanka kako bi se pronašla što kvalitetnija rješenja za što brži izlazak iz nastale ekonomske krize.

UPFBiH traži od članica da se dosljedno pridržavaju mjera kriznih štabova s ciljem sprečavanja širenja pandemije COVID-19

Udruženje poslodavaca Federacije Bosne i Hercegovine apeluje na svoje članice i sve poslodavce u Bosni i Hercegovini da se maksimalno pridržavaju preporuka i naredbi kriznih štabova u vezi sa sprečavanjem širenja pandemije COVID-19, s ciljem zaštite života i zdravlja radnika i stanovništva, ali i održavanja privrednih tokova.



Iz UPFBiH od nadležnih institucija zahtijevaju hitno poduzimanje mjera kako bi se osiguralo poštivanje preporuka i naredbi kriznih štabova. U tom pravcu se insistira da nadležne institucije još aktivnije vrše nadzor nad provođenjem propisanih mjera u svim prostorima gdje se okuplja veći broj ljudi.

„Svjedoci smo povećanja broja zaraženih i broja oboljelih od COVID-19 i u skladu s tim insistiramo da nadležne institucije pojačaju nadzor nad provedbom propisanih mjera, kako bi se zaštitili životi i zdravlje građana, ali i privredni procesi. To ćemo jedino uspjeti strogim provođenjem propisanih mjera i jačim nadzorom nad istim“, naglašavaju iz UPFBiH.

Iz UPFBiH apeliraju na dosljednom pridržavanju propisanih mjera i pojačanim nadzorom nad njihovim provođenjem, jer je nužno osigurati kontinuitet ekonomskih aktivnosti u zemlji, kako se ne bi ugrozilo i ovo malo privrednih aktivnosti. Podsjećaju na ogromne štete i posljedice koje je pretrpila privreda FBiH i BiH tokom prvih mjeseci

pandemije, kada je većina kompanija svoje aktivnosti svela na minimum, a došlo je i do značajnog gubitka radnih mjesta. Kako se taj scenario ne bi ponovio iz UPFBiH još jednom apeluju na nadležne da se donesu adekvatne izmjene i dopune Zakona o radu FBiH kako bi se spriječila nova otpuštanja radnika i gubici radnih mjesta.

Osim pojačanog nadzora, iz Udruženja poslodavaca FBiH od nadležnih insitucija insistiraju na edukacijama koje imaju za cilj prevenciju i sprečavanje širenja pandemije COVID-19, što bi značajno pomoglo poslodavcima u organiziranju procesa rada uz minimalan rizik od širenja zaraze u njihovim poslovnim prostorima.



„U tom pravcu, Udruženje poslodavaca Federacije BiH početkom septembra će organizirati edukacije za naše članice u saradnji sa Kriznim štabom FBiH i Kriznim štabom Ministarstva zdravstva FBiH. I na ovaj način želimo sačuvati živote i zdravlje naših radnika, osigurati nastavak ekonomskih aktivnosti u uvjetima pandemije za koju niko nije siguran koliko će još trajati i kada će završiti. Želimo odgovorno djelovati i raditi kako bismo osigurali da naši radnici budu zdravi, adekvatno plaćeni uz izmirene sve obaveze prema budžetskim i vanbudžetskim fondovima", naglašavaju iz UPFBiH.



Medijska kampanja za usvajanje prijedloga UPFBiH

U razgovoru o prijedlozima izmjena i dopuna zakona koje je predložilo Udruženje poslodavaca FBiH, a koje će značajno doprinijeti olakšanju i poboljšanju poslovnog ambijenta, predstavnici velikih kompanija, članica UPFBiH, su na online sastanku održanom 04. augusta 2020. godine zaključili da su ovakvi prijedlozi od vitalnog značaja za unapređenje poslovnog ambijenta u FBiH i otvaranje novih radnih mjesta. Sastanku su prisustvovali i predstavnici PR i marketing agencija.

Udruženje poslodavaca FBiH, kroz prijedloge izmjena i dopuna zakona, zastupa interese svojih članica, ali i cjelokupne društvene zajednice, jer se radi o zakonima koji će umnogome olakšati i unaprijediti poslovni ambijent, a riječ je o primjedbama formulisane u formi amandmana na Prijedlog zakona o doprinosima i Prijedlog zakona o porezu na dohodak, kao i na Prijedlog zakona o izmjenam i dopunama Zakona o porezu na dobit.

Neophodno je detaljnije upoznavanje šire javnosti s koristima koje navedeni zakoni donose bh. privredi, radnicima, ali i društvu u cjelini, te je dogovorena medijska/PR kampanja javnog zagovaranja za usvajanje predloženih zakona, a predstavnici kompanija su spremni pružiti svaki vid pomoći i staviti svoje potencijale na raspolaganje.



Prihvaćen prijedlog UPFBiH za produženje trajanja moratorija na kredite u FBiH

Upravni odbor Agencije za bankarstvo FBiH prihvatio je prijedlog Udruženja poslodavca FBiH o produženju trajanja moratorija na kredite u FBiH te usvojio odluku o privremenim mjerama koje banke primjenjuju za oporavak od negativnih ekonomskih posljedica uzrokovanih virusom COVID-19. Ista odluka donesena je i za mikrokreditne organizacije i leasing društva, koja posluju pod nadzorom

Agencije za bankarstvo FBiH (FBA).

Ovim odlukama osigurava se stabilnost i kontinuitet djelovanja subjekata bankarskog sistema u svrhu ublažavanja ekonomskih posljedica izazvanih virusnim oboljenjem COVID-19, kao i djelovanje u cilju očekivanog oporavka privrede.

Posebne mjere iz odluka podržavaju mogućnost moratorija na otplatu kreditnih obaveza, modalitete prilagođavanja načina i dinamike otplate kreditnih obaveza i druge oblike podrške klijentima subjekata bankarskog sistema koji su direktno ili indirektno pogođeni negativnim ekonomskim efektima.

U Odluci su usvojeni i prijedlozi UPFBiH, kao što je, između ostalog, i da kamatna stopa za modificirane izloženosti ne može biti veća nego što je bila definirana osnovnim ugovorom, te da prilikom ugovaranja posebnih mjera, banka ne može naplaćivati dodatne naknade za izvršene usluge, odnosno naknade povezane sa modifikacijom izloženosti.

Zahtjevi za primjenu mjera iz ovih odluka mogu se podnositi bankama, mikrokreditnim

organizacijama i lizing društvima do 31.12.2020. godine.

[Odluka o privremenim mjerama koje banka primjenjuje za oporavak od negativnih ekonomskih posljedica uzrokovanih virusnim oboljenjem „COVID-19“](#)

[Odluka o privremenim mjerama koje lizing društva i mikrokreditne organizacije primjenjuju za oporavak od negativnih ekonomskih posljedica uzrokovanih virusnim oboljenjem „COVID-19“](#)


UIO podržao inicijativu UPFBiH za izmjene Zakona o akcizama koji će se olakšati nabavku alkohola namijenjenog za proizvodnju sredstava za dezinfekciju



Upravni odbor Uprave za indirektno oporezivanje BiH je na inicijativu Udruženja poslodavaca Federacije Bosne i Hercegovine na sjednici održanoj 31. augusta 2020. godine razmatrao prednacrt Zakona o izmjenama i dopunama Zakona o akcizama u BiH koji se odnosi na olakšice prilikom nabavke alkohola

namijenjenog za proizvodnju sredstava za dezinfekciju.

Udruženje je u svojoj inicijativi koja je prije upućena Vijeću ministara BiH, Upravi za indirektno oporezivanje BiH i Koordinacijskom tijelu BiH za zaštitu i spašavanje zatražilo hitno donošenje privremene mjere za oslobađanje od plaćanja akcize na alkohol (ethanola) koji pravna lica koriste kao repromaterijal u proizvodnji sredstava za dezinfekciju, čišćenje i pranje. U inicijativi je navedeno da bh. proizvođači u periodu



vanredne situacije izazvane Covidom-19 uložili sve raspoložive resurse i snagu kako bi proizveli dovoljno sredstava za dezinfekciju kojim snabdjevaju sve javne ustanove, trgovine i stanovništvo. Obzirom da nisu u mogućnosti obezbijediti dovoljne količine etil alkohola koji je neophodan u procesu proizvodnje, bh. proizvođači su primorani vršiti uvoz istog od dobavljača izvan BiH, te su potpuno ovisni o ino tržištu.

Ukoliko u daljnjoj proceduri budu prihvaćene predložene izmjene iz prednacrtu ovog zakona onda će domaćim proizvođačima biti omogućeno da ne plaćaju trošarinu na alkohol koji se koristi za dezinfekciju ili kao repromaterijal.


Nakon proglašenja pandemije virusa Covid-19, povećana je potreba za nabavom alkohola za proizvodnju dezinfekcijskih sredstava jer su domaće kompanije u ovom području potpuno vezane za inostrano tržište što je bio jedan od ključnih razloga da UO podrži zahtjeve poslovne zajednice u ovom području.

Iskazana potreba za osnivanjem Centra za edukaciju

Direktor i sekretar Udruženja poslodavaca FBiH Mladen Pandurević i Mersiha Jusić održali su 05. augusta sastanak sa dekanesom Visoke škole za turizam i menadžment iz Konjica Marijanom Šećibović i osnivačem te škole Refikom Šećirbegovićem. Sastanku je prisustvovao i ekonomista Udruženja Husein Al-Baldawi.

Razgovarano je o trenutnoj situaciji na tržištu rada, s posebnim osvrtom na potrebe tržišta za određenim kvalifikovanim kadrovima. Navedeno je da je srednjoškolsko obrazovanje u ozbiljnom problemu da zadovolji potrebe tržišta, te da je učenje na daljinu puka improvizacija koja neće polučiti željene rezultate. U tom kontekstu, neophodno je iznaći funkcionalno rješenje za kvalitetno obrazovanje srednjoškolaca, ali i odraslih.

Udruženje poslodavaca Federacije BiH je prije iniciralo ideju o osnivanju Centra za edukaciju, i to nakon detaljnih konsultacija sa članstvom, te uvida u dokazane činjenice da sistem obrazovanja i dodatne edukacije u najvećem broju slučajeva ne pružaju ono što je realna potreba poslodavaca. Dodatnim obrazovanjem i praktičnom obukom uposlenika, došlo bi do smanjenja broja otpuštenih i nezaposlenih i poboljšanja ekonomske slike u FBiH. Ovu ideju Udruženje je predstavilo članstvu i dobilo pozitivne povratne informacije i podršku ka osnivanju Centra.



Nakon konsultacija s prof. dr. Marijsnom Šećibović i prof. dr. Refikom Šećibović zaključeno je da će Udruženje poslodavaca FBiH uz njihovu podršku poduzeti aktivnosti za osnivanje i registraciju Centra za edukaciju s ciljem da polaznici obuke steknu potrebna znanja i vještine i osposobe se za tržište rada s posebnim akcentom na ranjive i teško zapošljive kategorije.

Centar za edukaciju će na osnovu identifikacije potreba domaćeg tržišta rada u privatnom i javnom sektoru u kojem se traže da stečena znanja i vještine budu u skladu s operativnim poslovima kojima se pojedinci i organizacije bave, u programske sadržaje uvrstiti širi izbor zanimanja za programe sticanja znanja i vještina, programe prekvalifikacije, programe usavršavanja i programe osposobljavanja, itd..

UPFBiH osniva Edukacijski centar

Udruženje poslodavaca FBiH je nakon konsultacija s članstvom i i analize stanja u privredi FBiH, s posebnim osvrtom na potrebe izvozno orijentisanih grana privrede, pokrenulo aktivnosti za osnivanje i registraciju Centra za edukaciju Udruženja poslodavaca FBiH. Cilj uspostave Centra za edukaciju je osposobljavanje, prekvalifikacija i dokvalifikacija deficitarnih kadrova za izvozno orijentisane kompanije iz oblasti drvne i metalne idustrije.

Planirano je da UPFBiH sprovodi teoretski dio obuke, a da se praktični dio obuke održava u kompanijama članicama s kojima će se potpisasti ugovori o saradnji. Kompanije će morati zadovoljavati visoke standarde zaštite na radu, zaštite životne sredine, tehničko-tehnološke i kadrovske uslove.



Akcentat će biti stavljen na teško zapošljive kategorije, kao što su mladi do 30 godina starosti i žene. Programima obuke će se vršiti edukacija za zanimanja koja su tražena na tržištu rada i koja su više plaćena u odnosu na industrijski prosjek. Dugoročni učinak ovakvog pristupa se ogleda u smanjenju stope nezaposlenosti mladih i žena, proširenju kapaciteta privrede, osvajanju novih tržišta i u konačnici povećanju javnih prihoda po osnovu direktnih i indirektnih poreza.

Udruženje će angažovati najeminentnije stručnjake za izradu elaborata, kurikuluma i osmišljavanje dugoročne održivosti Centra, dok će s kompanijama definisati obuku za zanimanja koja su deficitarna.



UPFBiH i AmCham o produblivanju saradnje

Direktor Udruženja poslodavaca FBiH Mladen Pandurević održao je 25. augusta sastanak sa novoimenovanim generalnim sekretarom Američke trgovačke komore u BiH Nedimom Hamzićem, s ciljem upoznavanja sa aktivnostima djelovanja ove dvije organizacije u narednom periodu.

Direktor UPFBiH Mladen Pandurević istakao je da je Udruženje svoje aktivnosti u posljednjem periodu najviše baziralo na insistiranju usvajanja prijedloga Udruženja za izmjene i dopune zakona kojima će se omogućiti olakšanje i poboljšanje poslovnog ambijenta, te pomoći u prevazilaženju ekonomske krize uzrokovane pandemijom Covida-19.

Pandurević je objasnio da se tu radi o setu fiskalnih zakona s ciljem rasterećenja privrednog sektora, očuvanja radnih mjesta i povećanja prihoda zaposlenika, kao i šest zakona koji se već nalaze u parlamentarnoj proceduri, a radi se o sitnim izmjenama zakona koji bi značajno doprinijele rasterećenju privrede. Također, Udruženje zahtjeva i nastavak poticaja privredi do kraja tekuće godine kao i povećanje minimalne plaće.

Hamzić je kazao da postoje zajednički interesi te da AmCham planira svakako aktivnije pristupiti radu na razozu glasa stručnih komiteta koji djeluju unutar Komore s ciljem unapređenja poslovne klime u BiH.

U narednom periodu ove dvije organizacije razmotrit će i organizovanje webinaru na kojima bi se razgovaralo o temama značajnim za poslovnu zajednicu.


Zaključeno je da je potrebno sinergijski djelovati u cilju spašavanja ekonomije koja je već ugrožena.

UPFBiH počinje sa realizacijom projekta "Poslovanje bez korupcije"



Udruženju poslodavaca FBiH, potpisivanjem Ugovora sa Centrima civilnih inicijativa, odobren je projekat "Poslovanje bez korupcije" koji se realizira u okviru krovnog projekta „Podrška građanima u borbi protiv korupcije“, a koji provode Centri civilnih inicijativa (CCI), kao glavni implementator, te Transparency International BiH (TIBiH) i Centar za razvoj medija i analize (CRMA) kao partneri na projektu, a podržan je od strane Američke agencije za međunarodni razvoj (USAID).

Korupcija sputava privredni razvoj, podriva socijalnu stabilnost i nespojiva je sa pravnom državom jer razara povjerenje u javne institucije, podriva slobodno tržište, odbija investitore stvarajući nelojalnu konkurenciju i monopole. Problem korupcije postoji od zavšetka rata u BiH i od tada nisu poduzete efikasne mjere na suzbijanju korupcije među poslodavcima. Vlast nacionalno podijeljena, ne samo da nije spremna da se ozbiljno pozabavi ovim pitanjem, nego njeni pojedini zvaničnici tolerišu, prikrivaju i podstiču korupciju, sve pod plaštom zaštite nacionalnog interesa. Kreiraju i usvajaju propise koji podstiču korupciju, te sprječavaju njihovu izmjenu.



Cilj projekta "Poslovanje bez korupcije" je doprinijeti smanjenju prostora za koruptivne radnje nosilaca izvršne i zakonodavne vlasti, kao i izloženosti poslodavaca korupciji kako bi se stvorili preduslovi za fer tržišnu utakmicu i poboljšanje poslovnog ambijenta u bh. društvu, kroz iniciranje izmjene postojeće legislative koja potiče korupciju, uspostavu javnih registara, uspostavljanje web platforme za prijavu korupcije i besplatnu pravnu pomoć, pružanje svih neophodnih informacija poslodavcima, te javnu kampanju kojom će se, na osnovu prijave koruptivnih radnji s kojima se poslodavci susreću, vršiti javni pritisak na rješavanje prijavljenih slučajeva korupcije i pozvati na odgovornost institucije i pojedince odgovorne za rješavanje konkretnog problema.

Očekivani rezultati projektnih aktivnosti su:

- Usvajanje novih i unapređenje postojećih zakona koji uređuju oblast borbe protiv korupcije;
- Smanjenje mogućnosti za korumpiranje inspekcijskih organa i ostalih nosilaca izvršne i zakonodavne vlasti;
- Održavanje tematske sjednice Parlamenta FBiH, tematske sjednice Vlade FBiH i tematske sjednice Ekonomsko-socijalnog vijeća za teritorij FBiH na temu borbe protiv korupcije;
- Kreiranje web platforme „Poslovanje bez korupcije" putem koje će korisnici imati mogućnost anonimne prijave korupcije, te koja će obezbijediti pružanje pravne pomoći članstvu u vezi s korupcijom, pregled svih propisa koji se odnose na korupciju, bazu podataka, edukativne materijale i mogućnost interne komunikacije članova;
- Uspostava Centralnog registra grantova, poticaja i povoljnih kredita;
- Uspostava Centralnog registra vlasnika kapitala;
- Formiranje savjetodavnog tijela za borbu protiv korupcije sastavljenog od predstavnika poslodavaca, nadležnih državnih institucija, inspekcijskih organa, akademske zajednice i nevladinih organizacija.

Predviđeno vrijeme završetka projekta je kraj februara 2022. godine.

Potpisan ugovor o saradnji sa DL Trgovinom za projekat „Moj proizvod“ za 2020. godinu



Direktor Udruženja poslodavaca FBiH i direktorica DL Trgovine Mirjana Raščić potpisali su Ugovor o poslovnoj saradnji i partnerstvu na projektu "Moj proizvod" za 2020. godinu.

Ovo je peta godina realizacije projekta „Moj proizvod“ koji je pokrenut s ciljem jačanje bosanskohercegovačkih poduzeća, tačnije stvaranje pozitivne slike o bh. pivrednom sektoru. S obzirom da je pandemija CoVida-19 u velikoj mjeri uticala na privredni sektor u BiH, cilj projekta u 2020. godini će biti oporavak ekonomije od posljedica pandemija.

Projektom je predviđena kontinuirana kampanja u dnevnim novinama „Dnevni list“ kroz objave reportaža koje će biti edukativnog karaktera, te će se obrađivati aktuelna problematika s kojom se susreće privredni sektor u BiH. S ciljem progresivnijeg djelovanja u 2020. godini obrađene tematike će biti predstavljene kroz panel diskusije te po završetku panel diskusija će se sačiniti presjek stanja i analize.



Projekat „Zapošljavanje mladih i žena u drvnoj industriji“

Udruženje poslodavaca FBiH je zvanično dostavilo projektni prijedlog „Zapošljavanje mladih i žena u drvnoj industriji“ za USAID Workforce and Higher Access to Markets Activity (WHAM) projekat.

Udruženje će u saradnji s Federalnim zavodom za zapošljavanje i kompanijama iz sektora drvene industrije organizovati obuku za 40 polaznika nakon koje će polaznici steći teorijska i praktična znananja i vještine neophodne za rad u drvnoj industriji.

Sam proces obuke je koncipiran tako da Udruženje organizuje teoretski dio obuke angažmanom vanjskih eksperata. Teoretski dio obuke bi obuhvatao obuku o sigurnosti na radu i stručni teoretski dio. Praktični dio obuke bi se odvijao u samim kompanijama koje će osigurati neophodne uslove: mentore, mašine, opremu i repromaterijale za izvođenje procesa obuke. Obuka će se vršiti u tri kompanije koje su regionalni lideri u drvnoj industriji za područje Zeničko-dobojskog i Sarajevskog kantona, Srednjobosanskog i Tuzlanskog kantona, a koje zadovoljavaju visoke kriterije tehničko-tehnološke opremljenosti, stručnosti kadrova, prostornih i ostalih kapaciteta.

Cilj projekta je obučiti 40 polaznika treninga i osigurati zaposlenje kod poznatog poslodavca za sve polaznike koji uspješno završe trenažni proces. Udruženje poslodavaca FBiH kao nosilac projekta je osiguralo pisma namjere deset kompanija iz drvnog sektora za zapošljavanje polaznika nakon završetka obuke, a u skladu sa svojim potrebama, kao i regionalne lidere iz drvnog sektora kod kojih će se vršiti praktični dio obuke.

Rezultati ankete UPFBiH "Uticao COVID-19 na privredni sektor"



Aktuelna pandemija koronavirusa, osim direktnih posljedica na živote i zdravlje ljudi, sa sobom nosi i prateće učinke, među kojima prednjači usporavanje poslovne aktivnosti. Privreda Bosne i Hercegovine već se suočava sa brojnim i velikim izazovima i poteškoćama zbog pandemije.

Kako bi se ocijenilo stanje i poslovanje kompanija u BiH, Udruženje poslodavaca FBiH je kreiralo anketu "Uticao COVID-19 na privredni sektor" čije rezultate možete pogledati [OVDJE](#).

Rezultati istraživanja poslužit će procjeni sveukupnog stanja bh. privrede i mjera nadležnih instanci za ublažavanje ekonomskih posljedica, te kako bi se sačinili budući pravci djelovanja za skraćivanje ekonomskog šoka.

Nastavak implementacije projekata podrške privredi u Kantonu Sarajevo


U Vladi Kantona Sarajevo 28. augusta 2020. godine održan je sastanak na kojem su pored premijera Vlade, ministricе za rad, socijalnu politiku, raseljena lica i izbjeglice Jasne Agić, ministra finansija Jasmina Halebića i ministra privrede Draška Jeličića prisustvovali i predstavnici Udruženja poslodavaca KS.



Sastanak je organiziran s ciljem pregleda do sada realiziranih aktivnosti s ciljem provedbe „Korona zakona“ i programa kratkoročnih, srednjoročnih i dugoročnih mjera u KS, kao i zbog otpočinjanja druge faze podrške privrede u KS.

Istaknuto je kako je za isplatu dijela plate privrednim subjektima na području KS za mart, april i maj do sada iz Budžeta KS isplaćeno je 9.603.527 KM, dok je od pet miliona podsticaja za poljoprivredu, do sada isplaćeno 2.060.802 KM. Također je i 312 obrtnika, koji su ispunili uslove za dodjelu podsticajnih sredstava dobilo sredstva u iznosu od po 480,75 KM i to iz planiranih sredstava u iznosu od 150.000 KM namijenjenih za ovu grupaciju. Ukupna pomoć koja je do sada realizirana direktno u privredu KS, iznosi oko 33 miliona KM.

Kako je preostalo više od deset miliona KM neutrošenih sredstava, ministar Jeličić je



najavio da je potrebno donijeti nove kriterije, ali opet zajedno sa poslodavcima, kako bi se na najbolji način isplatila ta sredstva.

Član UO Udruženja poslodavaca KS Suad Ećo naglasio je kako se nijedan poslodavac nije žalio na kriterije koji su dati u prethodnim javnim pozivima, ali da je potrebno sad dati nove podjednako dobre za sve.

Poslovne aktivnosti u realnom sektoru postoje i ima onih koji su spremni uposliti ljude sa biroa Službe za zapošljavanje, ali uz određene podsticaje koji su postojali ranije.

Premijer je ovim povodom rekao da je sada u drugoj fazi implementacije srednjoročnih i dugoročnih mjera neophodno napraviti dobru analizu stanja i vidjeti koji to privredni subjekti i dijelovi privrede nisu bili obuhvaćeni nikakvom podrškom.

Posebno se referisao na radnike u turizmu i hotelijerstvu, jer su ovi sektori naprosto do pojave koronavirusa bili najveća razvojna šansa KS. To je bila najbrže rastuća grana privrede i sasvim je neprimjereno da se u ovoj situaciji, kada je turizam u potpunosti stradao ne iznađu modeli za aktivniju i snažniju podršku ovoj grani privrede.

S tim u vezi, zatražio je da se već za sljedeći sastanak pripremi analiza stanja i pripreme kvalitetni projekti u saradnji sa Turističkom zajednicom, Službom za zapošljavanje, da bi se iz raspoloživih sredstava iz budžeta KS išlo direktno na hotelijerstvo i turizam i druge grane privrede koji, kako je ponovio premijer, u prvoj fazi nisu bile obuhvaćene.

Na prijedlog premijera Nenadića, naredni sastanak sa poslodavcima najavljen je i zakazan za sljedeću srijedu, a sjednica Ekonomsko-socijalnog vijeća za utorak, posebno iz razloga jer su predstavnici privrede ponovno ukazali da svi članovi ESV nisu dali podjednak doprinos u borbi protiv korone, a to se posebno odnosi na predstavnike u javnom sektoru.

Održana sjednica ESV-a ZDK



Na sjednici Ekonomsko-socijalnog vijeća Zeničko-dobojskog kantona održanoj 31. augusta 2020. godine socijalni partneri su razmatrali Informaciju o realizaciji i utrošku sredstava iz Kreditno-garancijskog fonda Vlada ZDK.

Premijer Vlade Vlade ZDK Mira Ganić obrazložio je utrošak sredstava za poslednja dva mjeseca koliko je aktiviran pomenuti fond, a radi se o sredstvima kod ASA banke. Zbog vrlo složenih uslova koje je postavila banka u ovom periodu je odobreno samo dva kredita te je na raspolaganju oko 1.300.000 KM neutrošenih sredstava. Poslodavci su izrazili nezadovoljstvo dinamikom odobravanja utroška sredstava, te je zaključeno da će nadležna ministarstva pokušati sa bankom dogovoriti pojednostavljenje uslova plasmana ovih sredstava u cilju što brže aktivacije.

Nadalje, socijalni partneri su razmatrali Informaciju o realizaciji Javnog poziva za prikupljanje zahtjeva za odobrenje i dodjelu finansijskih sredstava za subvencioniranje 50% najniže neto plaće za mart 2020. godine. Predstavnici resornog ministarstva su predstavili rezultate za mart i obrazložili da se 2231 pravni subjekt prijavio. Komisije su


odbile 517 zahtjev koji ne ispunjava kriterije, dok je ostalima odobrena isplata. Socijalni partneri su zadovoljni ostvarenim rezultatom i brzinom rješavanja jako složene procedure, ali je istaknuto da postavljeni kriteriji



nisu obuhvatiti sve djelatnosti kojima je pomoć potrebna te da je neophodno pripremiti novi set mjera.

Nakon ove tačke, premijer Vlade ZDK prezentovao je Izvještaj o izvršenju Budžeta ZDK za period januar-juni 2020. godine, te je informacija jednoglasno primljena k znanju.

Pod tačkom razno, partneri su diskutovali o potencijalnim novim poticajima u okviru raspoloživih sredstava koja će se odvojiti u Budžetu za ove namjene. Nakon diskusija donesen je zaključak da se zaduži Ministarstvo privrede da pripremi prijedlog novih poticaja i da ga dostavi na razmatranje ESV-u i Vladi.



Objavljen Pravilnik o izmjenama i dopunama Pravilnika o primjeni Zakona o PDV

U Službenom glasniku BiH broj 44/20 od 24.7.2020. godine objavljen je Pravilnik o izmjenama i dopunama Pravilnika o primjeni Zakona o PDV. Navedenim pravilnikom su izmijenjene i dopunjene odredbe Pravilnika koje uređuju postupak povrata PDV-a stranim poreznim obaveznici.

Prethodno je pomenuti pravilnik bio predmetom rasprave na eKonsultacijama i upućen članicama Udruženja poslodavaca FBiH kako bi dale svoje sugestije, komentare i primjedbe.

Na inicijativu Udruženja poslodavaca FBiH izmijenjeni su članovi 94. i 95. Pravilnika. Pravilnikom o izmjenama i dopunama Pravilnika o primjeni Zakona o porezu na dodatu vrijednost uklanjaju se ograničenja koja trenutno imaju bh. poreski obaveznici u državama koje trenutno primjenjuju načelo uzajamnosti ili reciprociteta. Izmjenama se stvorio pravni okvir za uspostavljanje uzajamnosti sa državama koje traže uzajamnost i na taj način omogućava se povrat PDV-a našim privrednicima iz tih država.

Udruženje i dalje insistira na izmjeni člana 22. Pravilnika čijom bi se izmjenom uvela obaveza plaćanja PDV-a stranim prevoznici za usluge prevoza putnika i domaćim i stranim prevoznici PDV obračunavao na isti način, te poduzima aktivnosti za izmjenu pomenutog člana.

Pravilnik o izmjenama i dopunama Pravilnika o primjeni Zakona o PDV možete preuzeti [OVDJE](#).



Objavljen Javni poziv za odabir korisnika poticajnih sredstava

Ministarstvo privrede Kantona Sarajevo objavilo je javni poziv za odabir korisnika poticajnih sredstava "Poticaj razvoju male privrede" u Kantonu Sarajevo za 2020. godinu.

Predmet Javnog poziva je prikupljanje prijava subjekata male privrede sa područja Kantona Sarajevo u cilju odabira korisnika poticajnih grant sredstava za subvencioniranje (refundiranje dijela troškova) i sufinansiranje programa/projekata.

Kako se navodi u Javnom pozivu, u planu je sufinansiranje za sljedeće programe:

1. Subvencioniranje (refundiranje) troškova kamata po preuzetim kreditima – Ukupan iznos 400.000,00 KM.
2. Poticaj za tehnološku modernizaciju i primjenu standarda kvalitete – Ukupan iznos 250.000,00 KM
3. Poticaj za unaprjeđenje poduzetništva obrtnika – Ukupan iznos 50.000,00 KM
4. Poticaj start up subjektima male privrede – Ukupan iznos 150.000,00 KM
5. Poticaj razvoja ženskog preduzetništva – Ukupan iznos 150.000,00 KM

Prednost prilikom izbora korisnika imaju privredni subjekti koji se bave proizvodnom djelatnošću, a posebno izvozno orijentisani subjekti male privrede, te privredni subjekti koji posluju u strateškim privrednim granama za Kanton Sarajevo. Rok za dostavljanje prijava je 30 (trideset) dana od dana objave Obavještenja o Javnom pozivu.

Prijavne obrazce možete preuzeti na [linku Ministarstva privrede KS.](#)

[Javni poziv za odabir korisnika grant sredstava za poticaje 2020](#)


**Objavljen Javni poziv za kandidovanje
Programa utroška sredstava Trajnog revolving
fonda kod Union banke d.d. Sarajevo**



Vlada Federacija Bosne i Hercegovine donijela je na svojoj 229. sjednici, održanoj 09.07.2020. godine, Odluku o usvajanju Programa utroška sredstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2020. godinu. Donošenjem ove Odluke ispunili su se svi preduslovi za objavu Javnog poziva za kandidovanje Programa utroška sredstava Trajnog revolving fonda kod Union banke d.d. Sarajevo.

Pravo učešća na Javnom pozivu imaju privredna društva sa sjedištem u Federaciji Bosne i Hercegovine čija je primarna djelatnost definisana djelatnostima proizvodnje u sljedećim sektorima industrijske proizvodnje:

– Metalna, elektro i automobilska industrija,

- 
- Industrija građevinskog materijala i nemetala,
 - Drvna, papirna i grafička industrija,
 - Proizvodnja tekstila, odjeće, kože i obuće i
 - Hemijska, farmaceutska industrija i industrija gume i plastike,
- te da zapošljavaju najmanje 15 zaposlenika.

Cilj ovog Javnog poziva je stvaranje povoljnijeg okruženja i poboljšanje uslova za poslovanje u svim dijelovima Federacije Bosne i Hercegovine.

Javni poziv, zajedno sa Programom utroška redstava Trajnog revolving fonda kod Union banke d.d. Sarajevo, Federalnog ministarstva energije, rudarstva i industrije za dugoročno finansiranje projekata putem dodjele kredita za 2020. godinu, možete preuzeti sa [stranice Federalnog ministarstva energije, rudarstva i industrije](#).



UDRUŽENJE POSLODAVACA

UDRUŽENJE POSLODAVACA FBiH

MULA MUSTAFE BAŠESKIJE 12/3, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba